

醫統全書

傷寒殺車槌法卷三

江陰朱氏校刊本

明 餘杭陶 華述

吾專傷寒深明奧旨脈正則道合神機用藥則隨手取應的本續論全備發明殺車槌法世罕有承爲養生之寶矣今將秘驗三十七方就註三十七槌法二十條煎法二十條劫病并製解法名殺車槌也實爲我肺腑不傳之妙我後子孫一字不可輕露莫與俗人言莫使庸醫見爾宜謹慎珍藏毋違我之致囑也

劫病法

一傷寒發狂奔走人難制伏先於病人處生火一盆用
醋一碗傾於火上其煙沖鼻入內卽安方可察其陽狂
陰燥親切用藥無差若初起頭疼發熱惡寒方除已後
登高而歌棄衣而走踰垣上屋罵詈叫喊大渴欲死脈
來有力乃因邪熱傳裏陽盛發狂當用寒藥下之此爲
陽狂凡見舌卷囊縮者不治若病起無頭疼身微熱面
赤戴陽煩燥脈來沉微無力欲坐卧於泥水中乃因寒
熱而發燥卽陰證似陽當用熱藥溫之此爲陰燥凡見
厥冷下利譫語者不治醫者不看脈以虛陽上膈而燥

誤爲實熱反與涼藥使渴盛燥急則氣消成大害矣須詳脈來有力無力此爲良法

傷寒腹中痛甚將涼水一盞與病人飲之其痛稍可者屬熱痛當用涼藥清之清之不已而或遷脾硬痛大便結實煩渴屬燥屎痛急用寒藥下之若食積痛同治法若小腹硬痛小水自利大便黑身目黃者屬蓄血痛亦用寒劑加行血藥下盡黑物則愈此三者皆痛隨利減之法也

若飲水愈加作痛屬寒痛當用溫藥和之和之不已而

或四肢厥冷腹痛嘔吐瀉利急用熱藥救之須詳脈來
有力無力此爲良法

傷寒直中陰經真寒證甚重而無脈或吐瀉脫元而無
脈將好酒薑汁各半盞與痛人服之其脈來者可治當
察其陰用藥不拘脈浮沉大小但指出見者生如用
此法脈不至者必死又當問病人有何疼痛處若有痛
證要知痛甚者脈必伏宜隨病制宜如無痛證用此法
而脈至者此爲吉兆尤當問病人若平素原無正取脈
須用覆手取之脈必見也此屬反關脉診法與正取法

同若平素正取有脈後因病診之無脈者亦當覆手取之取之而脈出者陰陽錯亂也宜和合陰陽如覆取正取俱無脈者必死矣此爲良法

一傷寒舌上生胎不拘滑白黃黑俱用井水浸青布片於舌上洗淨後用生薑片子時時浸水刮之其胎自退凡見舌生黑胎芒刺者必死此熱毒入深十有九死是腎水尅心火也若發黃者用生薑時時週身擦之其黃自退若心胸脇下有邪氣結實滿悶硬痛又法用生薑一劬搗渣去汁炒微燥帶潤用絹包於患處款款熨之

稍可又將渣和均前汁炒乾再熨許久豁然寬快俱爲良法

一傷寒鼻衄成流久不止者將山梔炒黑色爲細末吹入鼻內外將水紙搭於鼻沖其血自止若點滴不成流者其邪在經未解照後秘方用藥不在此法

一傷寒熱邪傳裏服轉藥後鹽炒麩皮一升將絹包於病人腹上款款熨之使藥氣得熱則行大便易通矣

一傷寒吐血不止用韭汁磨京墨呷下其血見黑必止如無韭汁用雞子清亦可正謂赤屬火而黑屬水也

一傷寒直中陰經真寒證或陰毒證身如被杖腹中絞
痛嘔逆沉重不知人事四體堅冷如石手指甲唇青藥
不得入口六脈沉細或無脈欲絕者將葱縛一握切去
根葉取白三寸許搗如餅先用射香半分填於臍中後
放蔥餅臍上以火熨之連換二三餅稍醒確入生薑汁
煎服回陽救急湯如不醒再灸關元氣海二三十壯使
熱氣通其內逼邪出於外以復陽氣如用此法手足溫
和汗出卽醒者爲有生也如用此法手足不溫汗不出
不省人事者必死也此爲良法

一傷寒熱病熱邪傳裏亢極無解用黃連煎水一盞於井中頓冷浸青布搭在胸中徐徐換之待熱勢稍退卽除不可久瀆夏天用此法冬天不宜用

一傷寒服藥轉吐出不納者隨用竹管重捺內關後將生薑自然汁半盞熱飲其吐卽止大凡服寒藥熱飲熱藥寒飲中和之劑溫和服之如要取汗雖辛甘之劑亦宜熱服如要止汗雖辛甘溫之劑亦宜溫服此爲良法一中風痰厥昏迷卒倒不省人事欲絕者先用皂莢末撫紙燒煙沖入鼻中有嚏可治隨用吐痰法將皂莢末

五分半夏白礬各三分爲細末薑汁調服探吐後服導
痰湯加減治之無嚏不可治此爲良法

一治乾霍亂不得吐者用滾湯一碗入皂莢末三分鹽
一撮調服探吐莫與米湯設若與之卽死是穀氣反助
邪氣也

一中寒卒倒昏迷不省者先用熱酒薑汁各半盞灌入
稍醒後服加味理中飲爲效如不飲酒人止用薑汁灌入
之依法調治此證冬月甚有之餘月幾希矣

製藥法

一用附子去皮臍先將鹽水薑汁各半盞用沙鍋煮七
沸後入黃連甘草各半兩再加童便半盞再煮七沸住
火良久撈起入磁器內盛貯伏地氣一晝夜取出曬乾
以備後用庶無毒害項圓臍正一兩一枚者佳此爲良
法

一用川大黃須錦紋者佳剗成飲片用酒拌均燥乾以
備後用不傷陰血如年壯實熱者生用不須製之此爲
良法

一用麻黃去節先滾醋湯略浸片時撈起以備後用庶

免太發如冬月嚴寒腠理至密當生用者不須製之此爲良法

一用茱萸將鹽水拌均炒燥以備後用庶無小毒此爲良法

解藥法

一用附子後身目紅者乃附毒之過用蘿蔔搗水濾汁二大盞入黃連甘草各半兩犀角三錢煎至八分飲之以解附毒其紅即除如解遲必血從耳目口鼻出者必死無蘿蔔用蘿蔔子搗水取汁亦可此爲良法如無蘿

卷三
葡萄用澄清泥漿水亦可也

一用大黃後瀉利不止者用烏梅二箇炒粳米一撮乾薑三錢人參炒白朮各半兩生附子皮一錢半甘草一錢升麻少許燈心一握水二大鍾去滓後入炒陳壁土一匙調服卽止取土氣以助胃氣也此爲良法

一用麻黃後汗出不止者將病人髮披水盆中足露出外用炒糯米半升龍骨牡蠣殼各一兩研爲細末週身撲之隨後秘方用藥免致亡陽而死爲良法

煎藥法

一用發汗藥先煎麻黃一二沸後入餘藥同煎

一用止汗藥先煎桂枝一二沸後入餘藥同煎

一用和解藥先煎柴胡一二沸後入餘藥同煎

一用下藥先煎滾水入枳實一二沸後入餘藥同煎

一用溫藥先煎乾薑一二沸後入餘藥同煎

一用行血藥先煎桃仁一二沸後入餘藥同煎

一用利水藥先煎猪苓一二沸後入餘藥同煎

一用止瀉藥先煎炒白朮一二沸後入餘藥同煎

一用消渴藥先煎天花粉一二沸後入餘藥同煎

用止痛藥先煎白芍藥一二沸後入餘藥同煎

用發黃藥先煎茵陳一二沸後入餘藥同煎

用發斑藥先煎青黛一二沸後入餘藥同煎

用發狂藥先煎石膏一二沸後入餘藥同煎

用嘔吐藥先煎半夏一二沸後入餘藥同煎

用勞力感寒藥先煎黃耆一二沸後入餘藥同煎

用感冒傷寒藥先煎羌活一二沸後入餘藥同煎

用暑證藥先煎香薷一二沸後入餘藥同煎

用風病藥先煎防風一二沸後入餘藥同煎

一用腹如雷鳴藥先煎煨生薑一二沸後入餘藥同煎
一用溼證藥先煎蒼朮一二沸後入餘藥同煎
秘用三十七方就註三十七方槌法

升麻發表湯 卽麻黃湯自有加減法 治冬月正傷
寒頭痛發熱惡寒脊強脈浮緊無汗爲表證此足太
陽膀胱經受邪當發汗以頭如斧劈身如火熾者宜
用此湯

升麻
桂枝
川芎
防風
白芷
甘草
杏仁
麻黃

羌活

水二鍾薑三片葱白二莖槌法加江西豆豉一撮煎之熱服取汗如神宜厚被覆首凡中病卽止不得多服多則反加別病矣

本經發熱惡寒頭痛無汗而喘者本方加乾葛去升麻本經發熱惡寒身體痛者本方加蒼朮芍藥去杏仁

本經惡寒發熱身痒面赤者以其不得小汗出故也本方去白芷杏仁加柴胡芍藥

本經頭痛發熱惡寒胸中飽悶者本方加枳殼桔梗